

弘

簡

錄

弘簡錄卷之五十

明刑部員外郎仁和邵經邦弘齋學

皇清翰林院侍講學士四世孫遠平校閱

儒學 唐九之一

王通

父陸弟

徐文遠

陸德明

張後胤

曹憲

附魏模等

孔穎達

司馬才章王恭馬嘉屯

歐陽詢

子通

朱子奢

張士衡

賈公彥子大隱

蓋文達

文陸士季

陸士季

谷那律

孫奇相

蕭德言

子子儒

許叔牙

王元感

王紹宗

祝欽明

郭山惲

馬懷素

附王

尹知章

孫季良

殷踐猷

子寅

褚無量

白展忠

元行沖

附權實

啖助

趙匡施士陵

陸質

李戡

王通字仲淹其先周人家太原祁縣九代祖寓遭永嘉亂東遷

寓生空空生秀皆以文學顯秀生二子長玄謨以將略升次玄

則以儒術進通之六代祖也。仕宋歷太僕國子博士。究道德考
經籍。卒爲鴻儒。號江左先生。生煥煥。生虬虬。事魏太和中爲并
州刺史。始家河汾。生同州刺史音音。生安康獻公傑。傑生隆字
伯高。傳先王之業。教授門人。隋開皇初爲國子博士。待詔雲龍
門。文帝從容問以朕何如主。對曰。陛下聰明神武。得之於天。發
號施令。不盡稽古。雖負堯舜之資。終以不學爲累。帝默然曰。朕
之陸賢。常著典義要論七篇以獻。帝稱善。後歷昌樂。猗氏。銅川。
三縣令。所至著稱秩滿。遂不仕。歸四年。通始生。父筮之遇坤之
師。獻兆。廼祖上德而居下位。能以衆正。恨非其時。素王之卦也。
是子必能通天下之志。因名曰通。九年江東平。隆喟然而歎。通
方十歲。侍側曰。夫子何嘆。通聞古之爲邦。有長久之策。如夏殷
以來。數百載。四海常一統也。後之爲邦。行苟且之政。故魏晉以

下興廢無常。夫子蓋傷王政不綱。生人勞瘁。而天下將亂乎。隆
異之曰。其然乎。遂告以元經。再拜受之。十八年。隆宴居。歌伐木
而召通。通晏然再拜。敢問何謂也。隆曰。爾來自天子。至庶人。未
有不資友以成者也。道喪已來。廢斯久矣。小子勉旃。通於是。有
四方之志。受書於東海李育。學詩於會稽夏璜。問禮于河東關
朗。正樂於北平霍汲。考易於族父仲華。不解衣者六歲。其精志
如此。仁壽三年。通冠慨然有泝蒼生之心。西遊長安。隋帝召見
於太極殿。因奏太平十二策。遊王道。推霸畧。稽今驗古。恢恢乎
起天下於指掌。帝大悅。曰。得生幾晚。天以賜朕。下其議於公卿。
咸不悅。通知謀不用。且將有蕭牆之變。乃作東征之歌。浩然以
歸。帝再徵之不至。會崩。大業元年。徵復至。辭以疾。謂所親曰。茲
土之人。憂深思遠。有陶唐氏之遺風。矧先君弊廬在。可以避風。

雨有田可以具饘粥道之不行欲將安之退修其道而已乃續詩書正禮樂修元經讚易道九年而六經大就門人自遠而至河南董常太山姚義南陽程元中山賈瓊并杜淹李靖房玄齡魏徵竇威溫大雅薛收陳叔達等咸北面受業焉十年尚書召署蜀郡司戶明年復徵著作郎國子博士並不至江都難作踰年遘寢疾七日而終年三十四門弟子數百人會議取易黃裳元吉文在中之義私諡曰文中子絲麻設位哀以送之禮畢悉以文中子書還於王氏禮論二十五篇樂論二十篇續書一百五十篇續詩三百六十篇元經五十篇贊易七十篇並未及行遭時喪亂藏于篋笥東西南北未嘗離身唐武德四年天下大定夫人返于故居以書授于其弟疑疑字叔恬仕隋爲著作郎轉監察御史貞觀初通門人布在廊廟將播厥師施遂求其

書以編寫未就不之出御史大夫杜淹問凝子大賢之弟必有
異聞對曰亡兄講道河汾六經之外無所聞也淹曰昔門人咸
存記焉薛收姚義綬而名之曰中說茲書天下之昌言也後而
縣曲而當旁貫大義宏開教源門人請問之端文中行事之迹
備矣凝退而求之得中說一百餘紙大抵雜記不著篇目兼以
蠹絕磨滅未能詮次會凝出爲胡蘇令而歸遂考其目而繕錄
焉得六百六十五篇勒成七十五卷分爲六部號曰王氏六經
凝終洛州錄事通二子福郊福時歷上蔡簿雍州司戶參軍

冊曰吁嗟史氏不列文中一以私怨一以自訟天生聖人
道順言從回也生知難再其逢贊附太惑擬像太工言多
反綴經續反窮天苟假年不辨自通廣大日臻高明日崇
斯是大觀人曷吾恫萬古斯文不棄至公

徐贲字文遠以字行南齊司空孝嗣五世孫父微梁秘書郎母
元帝女安昌公主江陵陷俘入咸陽遂家洛州偃師以寒貧兄
文林鬻書自給文遠就聞之因博通五經尤明左氏春秋從耆
儒沈重質問時重任太學授業常千人不數日文遠輒辭去或
問其故荅曰日聽所說悉紙上陳言若賸隱處從所未見重知
之召與反復研辨嗟嘆其能性方正純厚有儒者風寶城楊玄
威李密王世克皆從受學隋開皇中累遷太學博士以授漢王
諒經坐累除名大業初禮部侍郎許善心復薦爲國子博士包
愷褚徽等皆預焉世稱文遠左氏褚徽禮魯達詩陸德明易皆
一時之冠其說經徧舉先儒異論分別是非乃出新意以折衷
之聽者忘勞越王侗署國子祭酒洛陽餓自出樵採因爲李密
所得尚執故禮尊以南向謝曰前者幸托迂謬受禮將軍今旣

擁兵百萬威鎮四海。猶能屈體老夫。此盛德也。安敢不盡將軍
若欲爲伊霍。繼絕扶傾。僕雖老。猶堪盡力。如欲爲莽卓。乘危迫
險。老夫耄矣。無能爲也。密頓首曰。備位上公。思所以竭力匡奉
國難。報復讐恥。立功贖罪。然後入見天子。請罪司敗。惟先生教
之。文遠曰。將軍名臣子。累世盡節。前陷玄。感行逃。未復。今若全
之以忠孝。天下之人。實遂所望。密曰。恭聞命矣。俄而世充專制
殺元文都等。密又問計。對曰。世充殘忍。而意褊促。必有異圖。將
軍前計爲不諧矣。非破之。不可以朝。密曰。常謂先生儒者。不學
軍旅。至籌大計。乃明畧過人。未幾密敗。復入東都。世充給廩異
等。而文遠見輒先拜。或問故。答曰。密君子。尚能受讓。世充小人
無容。相顧相時而動可也。世充僭號。復舊職。子士會來奔。世充
怒。絕其廩。餓幾死。復出樵採爲羅士信所獲。送京師。仍爲博士。

高祖幸國學觀釋奠文遠發春秋題論難鋒生隨方占對衆莫能屈帝稱善封東莞縣男卒年七十四撰左傳釋音三卷義疏三十卷孫有功

陸元明字德明以字行吳人初受學於周弘正善言易理陳後主爲太子徵四方名儒德明弱冠往叅焉召講承光殿與祭酒徐孝克數經談辨衆倚其貴勢多下之獨德明申答屢奪其說合坐咨賞解褐始興國左常侍陳亡歸鄉煬帝復起授祕書學士大業中與魯達孔褒共會門下省相酬難莫能訕還國子助教授越王侗經還司業王世充僭號封子玄恕僞漢王尊爲師卽其廬行束修禮德明恥之托病逃入成舉及平秦王辟爲文學館學士以經授中山王承乾補大學博士高祖親臨釋奠德明當講經隨方立義徧析其要帝大喜賜帛五十匹封吳縣男

卒撰經典釋文三十卷并易疏老子疏傳于世後太宗閱釋文嘉其博辨復賜其家布帛子敦信麟德中爲左侍極檢校右相封嘉興縣子致仕終大司成

張後胤字嗣宗崑山人祖僧紹梁零陵太守父冲陳國子博士入隋爲漢王諒并州博士後胤甫冠以學行禪其家高祖鎮太原引爲客令授秦王經義寧初爲齊王文學封新野縣公武德中擢散騎侍郎賜宅一區太宗卽位改燕王府諮議參軍從王入朝召見因陳曩在太原帝問隋運將終得天下者何姓答曰公家德業天下繫心若順天而動自河以北指揮可定然後長驅關右帝業可成帝曰是事朕未嘗忘乃賜宴月池帝從容又問今日弟子何如對曰昔孔子門人三千達者無子男之位臣翼贊一人乃王天下計臣之功過於先聖帝爲之笑令羣臣以

春秋酬難帝曰朕昔受大義今尚記之後胤頓首曰陛下乃生
知臣叨天功爲已力罪也帝大悅臨行拜本府司馬出爲睦州
刺史乞骸帝見其強力授以國子祭酒遷散騎常侍永徽中致
仕加金紫光祿大夫卒年八十三贈禮部尚書諡曰康陪葬昭
陵孫齊丘歷監察御史朔方節度使終東都留守諡曰貞獻曾
孫益宰相

曹憲江都人研精字學自漢杜林衛宏以後古文亡絕至憲復
興聚徒教授凡數百人公卿多從之游仕隋爲秘書學士煬帝
令與諸儒撰桂苑珠叢一百卷規正文字又訓註張揖所撰廣
雅分爲十卷學者推其該博命藏秘書貞觀中揚州長史李襲
譽薦授弘文館學士辭以年老不至卽家拜朝散大夫學者榮
之太宗嘗讀書有奇難字輒遣使就問具爲音注授驗詳複帝

容尚之卒年百五歲所撰文選音義甚爲當時所重與同郡魏模公孫羅李善相繼傳授其書遂興句容許淹自浮屠還爲儒多識廣聞尤精訓詁五人並名家羅官沛王府參軍無錫丞模武后時爲左拾遺子景倩亦世其學以拾遺名後歷度支員外郎

孔穎達字仲達冀州衡水人祖頊後魏南臺丞父安濟青州法曹參軍穎達八歲就學日記千言及長明左氏傳鄭氏尚書王氏易并詩禮記兼通算律善屬文同郡劉焯名重一時初造其門不加禮及請質所疑多出其意大加敬服大業初明經高第授河內郡博陽帝名天下儒官舉集東都以年最少遠方師宿恥出其下至欲加害楊玄感匿之而免補太學助教隋亂避地虎牢秦王平洛引爲文館學士遷國博貞觀初封曲阜縣男轉

給事中太宗留意經訓嘗讀論語至以能問於不能進曰此聖人設教欲人謙光已雖能仍就不能之人以質所未能已雖多仍就寡少之人更資其多內有道外若無中雖實客若虛非特匹夫如此若王者據尊極之位銜聰耀明恃才以肆則上下不通君臣道乖自古滅亡莫不由此帝稱善轉國子司業歲餘爲太子右庶子與諸儒議曆及明堂事多從其說同修隋史成加散騎常侍又修定五禮進母爲子數諍太子承乾過失擬爲孝經章句因文以盡箴諷帝悅賜黃金綵絹久之拜祭酒仍充東宮侍講帝幸太學講經已畢上釋奠頌手詔褒美命圖形凌煙閣以老致仕卒陪葬昭陵贈太常卿諡曰憲子志孫惠元咸力學寡言三世同任司業時論榮之惠元至太子諭德初穎達與顏師古司馬才章王恭王琰等受詔撰五經正義凡一百八

十卷馬嘉邈以爲繁冗駁正其失有詔更令裁定功未就永徽二年復詔宰臣于志寧張行成高季輔并詣博士弘文學士就加增損書始布下才章魏州貴鄉人父烜博涉五經善緯候少傳其業隋末爲郡博士房玄齡薦於太宗屢蒙詔問授國子助教論議該博學者稱之恭滑州白馬人少篤學教授鄉閭弟子嘗數百人貞觀初拜太學博士撰三禮義證世稱精博嘉邈魏州繁水人長於論議累除越王東閣祭酒退隱白鹿山諸來授業多至千人十一年召拜太學博士弘文館學士高宗引爲崇賢館學士數與洗馬秦暉侍講宮中終國子博士

歐陽詢字信本潭州臨湘人祖頽陳大司空父紇陳廣州刺史被誅詢自少藝于故人江總貌猥陋不揚而敏悟絕人教以書記輒數行同輩及長博貫經史爲隋太常博士高祖徵時從游

卽位擢給事中其書倣王羲之漸變其體轉更健勁人傳習之
以爲楷法嘗行路中見一碑乃索靖所書玩而悅之往返數四
遂宿其傍三日乃得去其所嗜類此高麗甚重其書遣使求之
以修藝文類聚成賜帛二百段貞觀初歷太子率更令弘文館
學士封渤海縣男卒年八十五 子通蚤孤母徐氏教以父書
刻意臨倣數年名亞於詢號大小歐陽體儀鳳中累遷中書舍
人母喪哀毀例許奪哀不得已徒跣至公門直宿在省籍藁于
地冬月家人潛加氈絮卽徹去非公事未嘗啓齒私居不輟號
慟年凶未葬衰經四年不釋人稱其孝遷累殿中監封渤海縣
子天授初轉夏官尚書爲司禮卿判納言事輔政月餘以固執
武承嗣立太子議爲來俊臣搆死神龍初追復官爵褚遂良嘗
問虞世南吾書何如智永答曰吾聞彼一字直五萬君豈得此

又問孰與詢。曰：吾聞詢不擇紙筆，皆得如志。君似不如。然則竟何如？世南曰：君若手和筆調，自可貴尚。邈良大服。通晚年矜重，以狸毛爲筆，覆以兔毫，管皆犀象，非是未嘗書。

朱子奢吳人，少從同鄉顧彪授左氏春秋，博觀子史，善文辭。大業中，直秘書學士。遭亂，罷還，依杜伏威。武德四年，從入朝，授國子助教。貞觀初，高麗百濟同伐新羅，連兵不解。帝以海外頗重文學，令假散騎侍郎持節諭旨，爲講大義，以平三國之憾。勿入其幣，還當重用。逮至，儀觀偉靡，藝人尊畏之。爲發明春秋意旨，三國咸聽。上書謝罪，資遣甚厚。還又納其美女。帝以雖違旨，猶愛其才，不至深譴。授以散官，直國子學，累轉諫議大夫。弘文館學士會高祖神主當祔太廟，止有四室，乃與尚書議奏，併附弘農府君、高祖神主，共爲六室。帝嘗詔起居紀錄，戒否朕欲見之。

以知得失奏曰陛下舉無過事雖見無嫌然恐以此開後世史官之禍使皆全身畏死則悠悠千載那復有附乎機陽尉魏禮臣以劾池陽令崔文康犯事獄成御史言其枉禮臣訴爲阿黨乞加再訊不如所言願死鞠報果虛詔加刑于奢奏律上書不實有定罪若皆抵死後有真枉誰敢復言得免未幾遷國子司業卒于官其爲人樂易能劇談以經誼緣飾每侍宴帝令與羣臣論難多諦聽之

張士衡瀛州樂壽人父文慶北齊國子助教士衡九歲喪母哀慕倍常父友劉軌思見曰吾爲君成就之乃授以毛詩周禮又從熊安生劉焯等受禮記自後徧講五經貫知大義尤精三禮仕隋爲餘杭令請老還家以禮學教授諸生當時顯者惟賈公彥李玄植爲最貞觀中燕王靈夔都督幽州以禮邀聘北面事

之太子承乾慕風迎致謁太宗洛陽宮賜以食攜朝散大夫崇
賢館學士太子常問北齊高氏何以亡對曰齊後主悖虐無度
昵近小人所信任如高阿那瓌之凶儉駱提婆之佞韓長鸞之
虐忠良外誅骨肉內難周師臨邲人莫爲用此所以亡復問事
佛營福因而規曰佛好清淨無欲仁恕存心如貪怵驕虐雖傾
財事之無損於禍且善惡必報若影赴形爲君仁爲臣忠爲子
孝則福祚永反是殃禍立至太子不能用請罷歸鄉里卒公
彥洺州永年人撰周禮義疏五十卷儀禮義疏四十卷終太學
博士子大隱儀鳳中爲太常博士會仲春告瑞太廟高宗問何
世而然大隱對古者祭以首時薦以仲月近世元日奏瑞二月
告廟不及其時遷累中書舍人垂拱中博士周棕請武氏立七
廟唐立五廟大隱斥其非奏言悖損國廟數下比諸侯悖大義

不可以訓武后不獲已僞聽之時皆服其沈正不詭有大臣體終禮部侍郎 玄植趙人學禮於公彥兼習左氏春秋傳於王德裕受毛詩於齊威博覽漢書并老莊諸家貞觀間爲弘文館直學士兼太子文學高宗時數召見官太學博士時帝闇弱頗箴切其短帝禮之不寤坐事遷巴令卒

蓋文達冀州信都人博涉前載尤明三傳性方雅美鬚貌綽有士風刺史竇抗大集耆儒劉焯劉軌思孔穎達以文達參焉時方妙齡文達依經辨難皆詣儒意所未叩一坐稱歎抗大奇之問安所從學焯曰此人岐嶷出白天然若以多問寡則焯爲之師抗曰此正所謂冰生於水而寒於水也武德中授國子助教秦王召授文學館直學士貞觀初擢諫議大夫兼弘文館學士除國子司業俄拜蜀王師王有罪坐免復起拜崇賢館學士卒

宗人文懿亦以儒學稱當時號爲二蓋武德中爲國子助教高宗別於秘書省置學以教諸王公子授博士旣升席公卿咸萃更相質問爲發揚風雅臂曉微密甚得詩人之致遠近宗仰終國子博士

陸士季蘇州人受學顧野王善左氏春秋史記漢書仕隋爲越王侗記室兼侍讀侗稱制擢著作郎王世充將行篡逆侗語士季隋有天下三十年果無忠臣一人乎對曰見危授命臣所願也請因其啓事潛謀左右殺之俄停侍讀不克太宗召爲太學博士終弘文館學士

谷那律魏州昌樂人貞觀中累遷國子博士淹貫羣書博覽有識緒遂良稱爲九經庫尋遷諫議大夫終弘文館學士嘗從太宗出獵遇雨沾衣沾濕因問若何得無漏對曰莫若以瓦爲之

其意在於諷諫也。帝悅，賜帛二百段。孫倚相亦通經學，仕爲秘書正字，讐覆圖書多所刊定，時以爲真正字。

蕭德言字文行，齊僕射思話玄孫，系出蘭陵祖。介梁侍中，父引陳吏部侍郎，並有名於時。德言博涉經史，尤明左氏春秋，好屬文，甫冠以國子生爲岳陽王賓客。陳亡，徙雍州。長安仁壽中，授校書郎，貞觀時歷著作郎、弘文館學士。太宗欲知前世得失，詔與魏徵、虞世南等哀次經史百氏，凡言帝王所以興衰者，上之及成，愛其書博而有要，稱曰：「使我臨事稽古不惑者，公等力也。」賚賜尤渥。其晚節學愈苦，自晝達夜，每開卷輒濯束帶危坐。妻子諫以老人，何終日自苦？答曰：「對先聖之言，何復憚勞？」詔以經授晉王，王爲太子，又兼侍講，請致仕，不許。下詔敦勉，封武陽縣侯，進秘書少監。久乃得謝。高宗立，以師傅恩，加銀青光祿大

夫全給俸祿遣通事舍人卽家致問乘輿至肅章門引見禮遇
隆重推恩晉府及東宮舊臣子孫並增秩賜金卒年九十七贈
太常卿諡曰博 子子儒字文舉高宗時爲奉常博士與陸遵
楷張統師權無二等共議北郊漢光武及咸和中以正月武德
以來用十月請循武德詔書圓方二丘明堂感帝神州宜奉高
祖太宗配仍祭昊天上帝及五天帝於明堂詔可長壽中歷天
官侍郎補授失序傳爲口實轉弘文館學士封潁川縣男卒
許叔牙字延基句容人少精毛詩禮記尤善諷誦貞觀中累授
晉王府文學兼侍讀尋遷太常博士兼弘文館直學士王昇春
宮加朝散大夫太子洗馬嘗獻毛詩纂義十卷太子賜帛百段
仍令寫付司經局高智周見之曰欲明詩者先宜讀此尋兼侍
講崇賢館學士卒

王元感濮州鄆城人。擢明經高第。調博城縣丞。紀王慎都督兗州。厚加禮數。其子東平王績往受業。天授中。稍遷左衛率府錄事。兼直弘文館。武后郊祀明堂。封嵩山。皆與韋叔夏等草儀具。衆推其練洽。轉四門博士。仍直弘文館。年雖老。夜以繼晷。讀書不廢。長安三年。上所撰尚書糾謬十卷。春秋振滯二十卷。禮記繩愆三十卷。并所注孝經史記藻草。丐官筆楮。寫藏秘書。有詔諸儒公議。可否祝欽明等。專守章句。沮詰其言。元感隨義申釋。無所撓屈。魏知古見其書。嘆曰。信可爲五經指南。徐堅劉知幾張思敬等嘉其異聞。每爲助理。聯疏薦之。遂下詔褒美。以爲倚前達之失。究先聖之旨。世之儒宗。不可多得。拜太子司議郎。兼崇賢館學士。中宗卽位。以東宮官屬。加朝散大夫。卒。

王紹宗字承烈。梁左民尚書銓曾孫。系本瑯邪。徙江都。少貧嗜

學勤臨模工草隸兼善諸客居僧坊傭書自給凡三十年徐薇業以幣劫之稱疾不赴將殺之賴唐之奇勸免事平李孝逸表其節武后召赴東都謁殿中褒慰良厚擢太子文學累進秘書少監爲人性澹素雅修飭足稱簡者公卿咸慕悅之坐與張易之兄弟結納廢卒于家嘗語人鄙夫書無工者特由水墨之積習耳故嘗精心率意虛神靜思以取之吳中士夫常以比虞世南邱悅被中畫腹正與相同兄玄宗亦隱嵩山號太和先生

祝欽明字文思京兆始平人父絳字叔良少通經頗著書質諸家疑異門人張後胤薦于朝對策高第終無極尉欽明少通五經兼涉衆史百家之說擢明經爲東臺典儀又中英才傑出業與六經等科授著作郎中宗爲太子拜率更令充侍讀授之以經俄兼弘文館學士卽位擢國子祭酒同中書門下三品進禮

部尚書封魯國公食實封三百桓彥範崔玄暉袁恕已敬暉等
皆從受周官大義朝廷尊之以匪親忌日中丞蕭至忠劾其不
孝貶申州刺史自忿無以澡祓意圖復用乃阿附韋后景龍三
年將郊與司業郭山惲陰迎后意謬立議論語見舊史帝疑之
名禮官質問太常博士唐紹蔣欽緒對欽明所引皆宗廟禮非
祭天地者周隋而上無皇后助祭事帝令宰相參訂又引博士
彭景直共議皆言后助王祭天地古無聞焉時左僕射韋巨源
助后阿意附會帝用其言皇后遂充亞獻仍取大臣李嶠等女
爲齋娘奉豆筵禮成齋娘有夫者詔悉進官初后屬婚上食禁
中帝與羣臣宴欽明自言能八風舞帝許之素因體肥搯地搖
頭腕自備諸醜態左右顧眄帝大笑侍郎盧藏用歎曰是舉五
經掃地矣景雲初侍御史倪若水劾奏二人腐儒無行譏佞亂

常請斥遠之。以肅具臣。乃貶欽明饒州刺史。山惲括州長史。後徙洪州都督。入爲崇文館學士。卒。山惲河東人。善治禮。時尚書張錫將作宗晉卿將軍張洽給事李行言皆工謏悅。帝喜錫乃爲談容娘舞。晉卿舞渾脫。洽舞黃鵠。行言歌駕車。西河曲餘臣各有所陳。皆極鄙褻。惟山惲獨無所事。已乃詠鹿鳴。蟋蟀二篇。未畢。李嶠以近規諷止之。帝下詔褒答。賜服一稱。末節不能善其守。終于國子司業。

則曰詭聖僻說。腥穢彰聞。兩觀正罰。少卿同羣。共保腰領。傷嗟不君。拜洛封嵩。從此益紛。

馬懷素字惟白。丹徒人。寓居江都。少師事李善。家貧。採樵代油。夜以繼日。博通經史。善屬文。擢進士。文學優贍。二科補郿尉。積勞遷左臺御史。時魏元忠流嶺。表太子僕崔貞慎。東宮率獨孤。

禪之同往。祖餞張易之誣與共謀。詔懷素按鞠以爲親故相送。卽非謀反。昔樂布不避彭越奏事。漢不坐罪。矧元忠罪非彭越比。不宜坐。后意解。又論李迥秀藉易之勢招賄玩法。罷其知政。尋轉禮部員外郎。充十道黜陟使。往西江處決。平恕時譽。歸之使還。遷考功郎中。覈取實才。不阿權貴。擢中書舍人。內供奉兼修文館直學士。開元初。拜戶部侍郎。封常山縣公。進昭文館學士。居職未嘗廢學。謙恭慎畏。玄宗稱爲長者。與褚無量日侍講讀於禁中。進乘肩輿。內館乘馬。親自迎送。待以師禮。時秘書文籍散漫。籤帙紛錯。拜爲秘書監。起自齊王儉七志以後。採取近書篇目及前志所遺者。續志以藏秘府。以少監盧僔崔沔爲副。使秘書郎田可封。康子元爲判官。名博士尹知章助教。王直國子趙玄默縣丞吳緯。馬利徵。宋辭。王陸紹伯。縣尉韋述。李子釗。

解崇質主簿王灣參軍劉彥直殷踐猷侯行果袁暉晁良祐母
照直講余欽進士王愜劉仲丘太祝鄭良金祕書丞殷承業分
部撰次正其舛繆未能有所緒別而卒帝舉哀洛陽南城門贈
潤州刺史諡曰文給輿還鄉喪事官給自後祕書官並號修書
學士草定四部人出已意無所統一踰年不成復詔褚無量元
行冲總緝部分考紉不應選者令踐猷愜治經述欽治史熈彥
直治子灣仲丘治集八年四錄成上之愜仲丘老病還紹伯卒
于官直終岐王府記室擢主默集賢直學士出利徵爲山在令
子釗終德州長史欽至太學博士集賢院學士灣洛陽尉良金
右補闕京兆府倉曹

尹知章絳州翼城人少勤學嘗夢神人持斧鑿破其心納以藥
劑驚而悟由是志意開朗通習六經研究精義受業日多長安

中武攸亶重其經學招致本府俄遷太常博士中宗議立涼武
昭王爲始祖以足七廟之數知章以爲世遠非王業所因乃止
坐武氏玷出爲陸渾令棄官歸田與散騎常侍解琬共居汝洛
間益修經術唐宗立張說薦擢禮部員外郎轉國子博士每休
沐不輟講授坐鎮雅俗有古人風性復和厚不見喜愠祿賜賜
給弟子未嘗問產業年五十餘卒於官門人孫季良等爲之立
碑頌德所著有易孝經莊老鬼谷韓非管子等書 季良偃師
人一名翌開元中爲校書郎左拾遺集賢院直學士撰正聲詩
集三卷

殷踐猷字伯起陳郡人給事中不害五世從孫博學尤通氏族
曆數醫方與賀知章陸象先韋述最善知章以其問無不知號
爲五總龜初爲杭州參軍舉文儒異等調曹州司法參軍尋直

秘書省兼麗正殿學士卒年四十八 少子寅舉宏辭爲太子校書出爲永寧尉性至孝病且死痛母蕭氏老不忍決及歛其子亮斷指翦髮納父棺中自誓事祖母如賓在時蕭後遇疾亮不脫衣者數年有白燕巢其楣後終給事中杭州刺史踐猷弟季友歷秘書郎善書從父仲容終冬官郎中有重名子承業歷太子左諭德右威衛將軍以謹樸稱族子成已晉州長史

稽無量宇弘度鹽官人幼孤貧勵志勤學家貧臨平湖有龍出人皆走觀獨如不聞展卷自若衆異之及長授經於沈子正曹福刻意墳典尤精三禮并史記擢明經除國子博士遷司業兼修文館學士與祝欽明等爭論南郊大事當先折衷周禮所載冬至祭天圓丘不以地祇配始祖配者亦不及妣太宗伯凡大祭祀王后不與則攝而薦饔豆又內宰職大祭祀后裸獻則贊

瑤降祭天無祿此乃宗廟祭耳巾車內司服掌后六服與五路無后祭天之服與路是后不得預郊祀明矣惟漢有天地合祭皇后參享末代黷神事不經見不可爲法不納尋以母老解官玄宗爲太子復官兼侍讀撰翼善記以進厚被禮答釋食日講孝經禮記隨端建議博敏而辨觀者嘆服進銀青光祿大夫賜以章服綵絹卽位遷左散騎常侍兼國子祭酒封鄆國公實封二百戶母喪弔祭賜物加等廬于墓左有鹿樹所蔭松栢哀號不輟鹿爲馴擾不復侵害刺史薛瑩表之喪除復任上重其耆老聽隨仗徐行入內爲置腰褰先是姚崇言太廟屋壞適與行會無量心非之疏言王者陰盛陽微則先祖見變今後宮非御幸者宜悉出之舉俊良擢耆靡輕賦慎刑納諫諛祭諂諛繼絕世則天人和會災異訖息車駕甫東又請所過名山大川丘陵

墳衍聖帝賢臣在祀典者。並詔致祭。自古受命之君。典殲繼絕。崇德報功。存人之國。大於救災。立人之後。重於封墓。願到東都。收敘唐初逮今功臣世絕者。支庶咸得承襲。帝納其言。卽詔無量祠堯平陽宋璟祠舜蒲坂蘇頌祠禹安邑所在刺史參獻。又求武德以來勲臣苗裔紹續其封命於東都乾元殿東廂彙整內府秘書除爲使表聞喜尉盧僎江陽尉陸去泰率府參軍王擇從武陟尉徐安貞分部營定。采天下遺書以益闕文。數年四庫完治。賜帛有差。西還書徙麗正殿。仍並兼麗正殿直學士。復就纂續。以畢前功。太子及刺王嗣直等五人未就學。薦國子博士都恒通郭謙光左拾遺潘元祚等以爲侍讀。七年太子齒。胄于學升坐。勸講百官觀禮。賚賜優厚。卒年五十七。帝聞悼痛。贈禮部尚書諡曰文所。撰史記至言十二卷。文集百卷。以後康子

元侯行果爲侍講禮遇漸薄矣去泰歷左右補闕內供奉擇從京兆人終汜水令開元十年尚書王志愔薦浚儀人白履忠博學操守貫知文史可代無量懷素入閣侍讀祭酒楊瑒又表其賢名赴京師授朝散大夫辭以老疾後終古大梁城號梁丘子元澹字行冲以字顯後魏常山王素連之後少孤養於外祖韋機及長博學多通尤善音律及訓詁之書古冢中得銅器似琵琶身正貝衆莫能辨行冲以木加絃彈之其聲清亮以爲阮咸所作因名阮咸登進士累遷通事舍人嘗謝狄仁傑曰君家蓄才猶富家蓄儲脯腊臠腴以供滋膳參朮芝桂以防疾疢伏想門下甘美多矣小臣願備一藥石仁傑笑曰君正吾藥籠中物何可一日無景雲中授太常少卿以系出拓拔恨無緇年乃撰魏典三十卷魏收舊史載魏明帝時河西柳谷出石有牛繼

馬之象謂晉元帝牛氏子冒司馬姓冲乃推尋事跡考校謠讖特著論述以爲昭成皇帝名捷繼晉受命之符開元初任太子詹事轉右散騎常侍東都副留守辨嗣彭王子志謙之誣原株蔓四十人遷大理卿又辨揚州長史李傑歷政清貞爲御史王旭所構請從輕條出之雖不見從時論稱美俄改國子祭酒封常山縣公再遷太子賓客弘文館學士知麗正院續成四庫書志奏增朝邑丞馮朝隱冠氏尉權實獻校書郎孟曉參軍韓單王嗣琳福昌令張俳進士崔藏之同入校又撰御註孝經疏義列于學官尋以老罷聽致仕卒年七十七贈禮部尚書諡曰獻有所註魏徵類禮義疏五十卷實獻後至臨淮太守曉左補闕單萊州別駕藏之膳部員外郎

啖助字叔佐趙州人徙關中爲人淹該經術天寶末調臨海尉

升陽主簿秩滿屏居善治春秋考三家短長縫紉漏闕號集傳
 凡十年乃成復攝其綱條爲例統其言孔子修春秋意以爲夏
 政忠忠之敵野商人承之以敬敬之敵鬼周人承之以文文之
 敵僇救僇莫若忠夫文者忠之末也武王周公承商之敵不得
 已而用之周公沒莫知所以改故其敵甚於二代孔子傷之曰
 虞夏之道竊怨於民商周之道不勝其敵故曰後代雖有作者
 處帝不可及已蓋言唐虞之化難行於季世而夏之忠當變而
 致焉故春秋以權輔用以誠斷理而以忠道原情不拘空名不
 尚捐介從宜救亂因時黜陟古語曰商變夏周變商春秋變周
 而公羊子亦言樂道堯舜之道以擬後聖是故春秋以夏爲本
 不宗周典明矣又言幽厲雖衰雅未爲風逮平王之東人習餘
 化苟有善惡當以周法正之故斷自平王以隱公爲始所以拯

薄勉善救周之敝革禮之失也。所愛惟公穀二家。以左氏多謬。其書乃出於孔氏門人。且孔子所稱如老彭伯夷等類。非同時左氏者。蓋如史佚遲任者。流其傳國語。綴屬不倫。序事乖刺。非一人所爲。乃集諸國史以釋春秋。後人傳爲丘明。非也。其著論多類此。卒年四十七。子異與門人趙世哀錄纂會所爲春秋集傳總例而損益之。總名纂例。世字伯循。河東人。歷洋州刺史。大曆時。世以春秋施士句以詩。仲子陵袁彞章彤章直以禮蔡廣成以易。彞蒙以論語皆自名其學。而士句子陵最卓異。士句吳人。兼善左氏春秋。以二經教授。由四門助教爲博士。秩滿當去。諸生封疏乞留。凡十九年。卒于官。弟子其非之所撰春秋傳未甚傳。後文宗喜經術。宰相李石言之。帝以爲穿鑿之學。徒爲異同。凡學者如浚井得泉而已。何必勞苦。求然後爲得耶。

子陵蜀人好古學舍裴眉山舉賢良方正擢太常博士通后
若大小戴禮常議太祖正東嚮位遷獻懿二主藏德明興聖廟
其言典正後異論紛洄復爲通難示諸儒不能誦久之典黔中
選補乘傳過家西人以爲榮終司門員外郎以文義自怡及亡
其家所存惟圖書及酒數斛而已

陸質本名淳字伯冲七代祖澄仕梁爲名儒世居吳明春秋質
師事趙主咲助靈傳二家學表陳少游淮南幕府薦授左拾遺
轉太常博士遷左司郎中歷信台二州刺史以素善韋執誼用
其力召爲給事中時憲宗尚在儲宮執誼懷其英發恐怒已專
恣用爲侍讀窺伺善意令解釋之每乘間輒有所言太子怒曰
陛下命先生爲寡人講學何可及他質惶懼趨出因得疾嘗執
誼未敗時病已甚太子爲臨問加禮故獨不及貶卒門人私諡

曰文通先生所著春秋集注并類禮各二十卷君臣圖翼二十
五卷

李戡字定臣世祖子蜀王湛六世孫幼孤貧好學大寒無膏掇
薪繼晷默念所記年三十明六經舉進士恥吏唱名亟還江東
隱陽羨里民有鬪爭不之官輒請戡以辨凡所論著積數百卷
常惡元白詩纖艷不逞乃集其類古者斷爲唐詩以譏正其失
平盧節度使王彥威表爲巡官府遷還洛陽卒

冊曰有唐設科辭賦侈靡士尚雕龍不循至理大名名儒
糠粃飾治流浪可羞五經掃地勸講禁中羣書博類先經
後藝遲晚莫致聖學榛蕪止於如是

弘簡錄卷五十一

皇清翰林院侍讀學士四世孫遠平校閱

文翰 唐十之一

虞世南 孔紹安子前孫若 袁朗從弟承 李百藥子安

賀德仁紀弟 庾抱 褚亮 蔡允恭劉孝 李玄道

李守素 姚思廉 顏師古從父游泰 薛收從子元敬提

令狐德棻 鄧世隆 顧胤 李延壽李仁 敬暉

劉伯莊子之宏附秦 崔信明 張蘊古附張昌齡 兄昌

崔行功附孟利貞 劉子玄從祖胤之從父延祐父藏

吳兢 韋述 徐堅父齊時

虞世南字伯施餘姚人祖儉梁始興王諮議參軍父荔陳太子

中庶子俱有重名叔父寄陳中書侍郎無子繼世南爲後自少
沈靜寡欲篤志勤學與兄世基並受吳郡顧野王學經十餘年
精思不倦至累旬不盥櫛長效徐陵爲文陵以爲得已意又師
智永書妙得其體聲名藉甚父卒哀毀不勝陳文帝遣中使護
視時寄陷於閩越陳寶應世南雖服除仍衣布飯蔬寄還乃已
陳滅入京世基文辭清勁瞻博不及人以方之二陸煬帝疾世
南峭直不甚信用大業初授秘書郎遷起居舍人世基已爲內
史侍郎當朝貴盛被服擬於王者世南不改已操躬履勤儉怡
然自守至宇文化及發難世基被誅向前抱持號泣請以身代
不納從至聊城陷于竇建德僞授黃門侍郎秦王滅建德引爲
本府記室參軍弘文館學士與房玄齡對掌文翰嘗命寫列女
傳于屏時無本暗記不失一字昇儲副太子中舍人卽位轉著

作郎兼學士時年已老乞骸不許遷右庶子固辭除秘書少監
上聖德論貞觀七年轉秘書監賜爵永興縣子上重其博識每
機務之暇引之談論共觀經史其容貌儒便若不勝衣而志性
抗烈每論及帝王爲政得失必存規諷多所補益帝或一言有
失未嘗不悵悵其懇誠若此八年進封縣公帝憂隴右山崩山
東大蛇見及江淮大水以問世南歷舉春秋時梁山崩晉侯從
伯宗之言故得無害漢文時齊楚地二十九山同日崩水大出
罷郡國貢施惠天下時不爲災後漢靈帝時青蛇及御座晉惠
帝時蛇長三百步見齊地經市入廟今見山澤適其所居淫雨
大水恐有冤獄枉繫宜省錄累囚庶幾或當天意帝然之遣使
賑民饑餓申理獄訟後星孛虛危歷氏餘百日帝訪羣臣又舉
齊晏嬰對景公曰公穿池畏不深起臺畏不高行罰畏不重是

以天見彗爲戒耳。臣願陛下勿以功高自矜。勿以太平自驕。慎
終于初。彗雖見。猶未足畏。帝曰。誠然。吾幸無三者之過。但年十
八舉義兵。二十四平天下。未三十卽大位。自謂三王以來。撥亂
之主。亦莫吾若。未免矜負。上天見變。其爲是乎。會唐國進獅子
詔。爲之賦。編之東觀。高祖崩。山陵準漢長陵故事。程役峻暴。人
力告倣世南疏。諫曰。古聖帝明王。非不欲崇大光顯其親。正以
高墳厚隴。金寶珍貝。適所以累之。是以深思遠慮。安於菲薄。爲
長久計。因舉漢魏以來。君臣議論。載在舊史。臣愚以爲霸陵因
山不起墳。自然高顯。今所卜地勢卽平。宜依周制。爲三仞之墳。
明器不得用金銀銅鐵。事訖刻石陵左。以明示大小高下之式。
藏之宗廟。爲子孫萬世法。矧自來帝王卽位之初。便營陵墓。近
者十餘歲。遠者五十年。今以數月之程。課數十年之事。其於人

力不亦勞乎。書奏稍得裁抑。帝嘗作宮體詩使廣和奏以聖作誠工體非雅正恐此詩一傳天下風靡帝不謂忤賜帛五十匹後數出畋獵復以爲言皆蒙嘉納帝每稱其有五絕一德行二忠直三博學四文詞五書翰十二年致仕授銀青光祿大夫卒年八十一贈禮部尚書諡曰文懿陪葬昭陵手勅魏王泰世南於我猶一體拾遺補闕無日無之誠當代名臣人倫準的今其云亡石渠東觀中無復人矣帝又爲詩述古典亡旣成嘆曰鍾子期之後將何所示耶敕褚遂良卽其靈座焚之後數歲又夢進讜言若平生翌日下制厚卹其家命圖形凌煙閣有集三十卷褚亮爲之序子昶終工部侍郎

孔紹安山陰人陳吏部尚書奘子少與兄紹新俱以文詞知名入隋徙居京兆鄠縣閉門誦古文集外兄虞世南歎異之嘆曰

本朝淪陷分從湮滅見汝兄弟竊謂不亡詞人孫萬壽與篤忘
年之好人稱孫孔大業末以監察御史監唐公軍討賊河東深
見接遇及受禪自洛陽閒行來奔高祖見之甚悅拜內史舍人
賜宅一區良馬錢帛因侍宴詠石榴詩曰祇爲來時晚開花不
及春人皆異之尋詔撰梁史未成而卒有文集五卷 子禎任
蘇州長史時曹王明爲刺史不循法度每諫以恩寵不可恃大
王不奉行國命恐今之榮位非大王所保明不悅後果坐法累
遷絳州刺史封武昌縣子卒諡曰溫子季翽早知名官至左補
闕 孫若思幼孤母褚氏親訓以學行知名舉明經遷庫部郎
中給事中多識朝廷典故中宗復位桓彥範等改革大事及疑
議多訪問之轉禮部侍郎出爲衛州刺史在職以清白稱時宗
室爲別駕者多不敬刺史行又不法若思舉奏李道欽犯狀請

加勅訊乃詔自今於刺史致禮久之加銀青光祿大夫賜絹百匹歷刺汝州加太子右諭德封梁郡公卒諡曰惠 曾孫志字惟微明氏族學與蕭穎士齊名撰百家類例稱爲至公官終著作郎

袁朗其先自陳郡仕江左世爲冠族高祖察宋司空死國難會祖昂梁中書監司空穆公仕齊爲吳興太守父樞叔憲仕陳皆爲僕射憲目難扶護後主陳亡徙蜀中朗少勤學性謹厚善屬文爲陳秘書郎江總重之嘗製千字詩時稱盛作後主召入禁中使爲月賦染翰立成以爲自此謝希益不能獨美矣又爲芝草嘉蓮二頌深見優賞歷太子洗馬德教殿學士遷秘書丞入隋爲儀曹郎武德初來歸與從弟承序皆授齊王府文學是祠部郎中封汝南縣男轉給事中卒太宗傷惜之有文集十四卷

孫誼神功中爲蘇州刺史 承序憲子清貞雅操實繼先風齊王府廢轉建昌令不尚煩苛人吏懷之高宗在藩選學行之士爲王僚屬岑文本薦其父子足稱忠烈兄給事中承家遇王世充受禪托疾不署名後召爲晉王友仍令侍讀兼弘文館學士卒從祖弟利貞中書令敬之孫高宗時爲太常博士周王府侍讀王立爲皇太子將會百官及命婦於宣政殿詔設九部伎并散樂利貞疏諫以前殿正寢非命婦宴會之地象闕路門非倡優進御之所請會於別殿自無所妨九部伎從東西門入停省散樂帝納其言命卽移麟德殿至日賜物百段終祠部員外郎中宗追贈祕書少監

李百藥字重規定州安平人隋內史令德林子自幼多病祖母趙氏因以百藥名之七歲解屬文父友齊中書舍人陸父馬元

熙因讀徐陵文有刈稻琅琊之語未詳所出百藥前曰春秋
子藉稱杜預注謂在琅琊一座大驚號爲奇童蔭補三衛長閒
皇初授太子通事舍人兼學士以疎悅喜劇伏輒謝病去十九
年襲父爵安平公楊素牛弘愛其才署禮部員外郎太子勇召
爲東宮學士奏議文表多出其手煬帝出鎮揚州召不赴銜之
卽位奪爵爲桂州司馬州廢還鄉里久之復授建安郡丞行達
烏程聞江都難作沈法興李子通杜伏威更相起滅轉側寇亂
中數被僞署危而不死會高祖遣使招伏威百藥勸之入朝使
與輔公祏留守伏威渡江至歷陽中悔將害百藥飲以石灰酒
因大洩利宿疾頓除後賴王雄誕保護獲免遂詣京師授吏部
侍郎公祏反貶涇州司戶太宗至涇州重其才名召與語悅之
貞觀元年拜中書舍人封安平縣男令撰齊書并修定五禮律

令明年除禮部侍郎時議裂土以封功臣乃上封建論據理詳切文載舊史帝納其言而止四年授太子右庶子與于志寧孔穎達陸敦信等侍講于弘教殿太子數戲蝶無度作贊道賦以諷述古儲戒事勸勵甚詳帝見而悅之賜綵三百段十年齊史成加散騎常侍進左庶子俄除宗正卿十一年五禮律令成進爵爲子帝嘗與賦帝京篇歎其工手詔卿身老而才則壯齒宿而意則新久之固乞致仕卒年八十四諡曰康百藥本名臣子才行並顯名流莫不宗仰藻思沉鬱尤長五言詩雖樵童牧豎皆能諷詠天性篤至侍父母喪還鄉徒跣數千里服除累年容貌癯瘠人稱其孝復好獎薦後進所得俸祿與親黨共之懸車之後怡然自得穿池鑿山文酒談賞以舒平生之志有集三十卷子安期亦七歲屬文從父貶桂州遇盜將以刃加跪泣請

代盜哀釋之貞觀初爲符璽郎預修晉書成除主客員外郎高
宗卽位遷中書舍人司列少常伯預決國事封泰山詔爲朝覲
壇碑文前後三典選部帝屢責侍臣不能進賢奏曰天下至廣
不爲無賢比見公卿有所薦進皆劾爲勿黨滯抑未申而皆毀
已至所以人人噤默以避譴謗若陛下忘其親讐惟才是用塞
譏毀路誰不竭忠帝納之尋檢校東臺侍郎同東西臺三品出
爲荊州大都督府長史卒諡曰烈孫義仲又爲中書舍人自此
四世掌誥人以爲榮

賀德仁越州山陰人父朋陳散騎常侍德仁兄弟八人少與兄
德基俱事祭酒周弘正以詞學稱時人語曰學行可師賀德基
文質彬彬賀德仁事陳爲吳興王友入隋歷豫章王府記室齊
王府屬出補河東郡司法素與建成善用爲隴西公友昇儲遷

太子中舍人轉洗馬貞觀初轉趙王友卒年七十餘有文集二十卷 弟子紀敘亦博學知名高宗時紀官至太子洗馬修五禮敘至率更令兼太子侍讀仍並爲崇賢館學士學者榮之
庾抱江寧人其先自潁川徙家祖衆陳御史中丞父趙南平王記室抱開皇中爲延州參軍入調尚書牛弘知其學術特給筆札令自序出身原委授翰便熟甚以爲奇後補元德太子學士禮賜甚優會皇孫載誕獻頌深被嗟賞義寧中爲隴西公府記室時從征伐軍國多務文移檄奏皆出其手終於太子舍人有集十卷

褚亮字希明其先自陽翟徙居錢塘會祖湮梁御史中丞祖蒙太子中舍人父玠陳秘書監前史著名亮少警敏博覽圖史經目輒記尤善屬文喜遇名賢相與談論弱冠詣僕射徐陵商確

文藝大爲所奇。後主召見使賦詩。在席江總諸人皆服其工。累遷殿中侍郎。入隋。歷東宮學士。太常博士。場帝議改宗廟之制。亮援古證今。凡數千言。具載舊史。未及行。坐與博士潘徽皆爲楊玄感所禮。貶西海司戶。徽降。咸定主簿。與俱行至隴山。徽道病卒。躬爲斂瘞。人皆義之。後爲薛舉黃門侍郎。舉滅秦王。聞其名。招徠之。謂寡人受命而來。嘉於得賢。亮頓首謝曰。舉不知天命。致抗王師。今釋而不誅。何異更生。王悅。賜以乘馬段帛。卽授王府文學。遇高祖獵。親格猛虎。懇愴致諫。禮納其言。每從王征伐。嘗預祕謀。甚見親禮。多與歡賞。從容諷議。有裨輔之益。爲文館學士。命爲十八學士。贊題名字。臥里藏之。書麻以韋履賢之。重并儲授太子舍人。轉中允。貞觀初。改弘文館學士。九年。遷散騎常侍。封陽翟縣男。十六年。進爵爲侯。食邑七百戶。歸老于家。

及寢疾帝遣醫候問不絕卒年八十八贈太常卿陪葬昭陵諡曰康長子遂賢雍王友次子遂良宰相

蔡允恭字君和與劉孝孫皆荊州江陵人允恭祖業梁儀曹郎中父大業後梁尚書允恭少丰采善綴文仕隋歷著作佐郎起居舍人雅善吟詠煬帝屬意詞賦有所作必令諷誦遣教官人允恭恥之授內史舍人固辭難後從竇建德歸爲秦府參軍二人同兼文館學士貞觀初除太子洗馬致仕卒有集十卷撰後梁春秋十卷 孝孫周石臺太守貞之孫少知名與當世詞人虞蔡孔庾登臨山水結爲文會大業末王世充弟杞王辯署爲行臺郎中辯降歸國武德初歷虞州錄事參軍貞觀六年遷著作佐郎爲吳王友王命採歷代文集撰古今類序詩苑四十卷歷諮議參軍遷洗馬未拜卒

李玄道本隴西人世居鄭州房玄齡之舅祖璵魏著作郎父行之隋都水使者玄道仕隋爲齊王府屬李密署爲記室王世充授著作佐郎還任秦王府主簿文館學士貞觀初累遷給事中封姑臧縣男出爲幽州都督王君廓長史專持府事每以義裁糾之由是有隙君廓掠良家子爲婢以遺玄道不納高書玄齡會君廓入朝私發之字草不識疑以謀已遂反坐流楊州未幾擢常州刺史風績清簡下詔褒美賜以繪帛久之加銀青光祿大夫以祿歸第卒子雲將官至尚書左丞

李守素趙州人初從王世充召署天策府倉曹參軍與渭州刺史李淹皆通姓氏譜學所論該博惟淹能抗之虞世南嘗與論江左山東人物始能記憶猶相酬對至北地諸侯次第如流皆有援據世南但笑不復能答嘆曰肉譜可畏遂號肉譜許敬宗

筆削皆其功也。賜雜綵五百段。加通直郎。凡政事許奪具得失。以聞。嘗展盡無所諱。會幸九成宮。疏諫離宮游幸。乃泰漢故事。非聖帝所宜。帝諭以朕苦氣疾熱。卽頓劇。不爲游賞。賜帛五十匹。轉散騎常侍。爵豐城縣男。卒。贈太常卿。諡曰康。陪葬昭陵。子處平。官至通事舍人。孫璿別傳。

顏師古字籀。其先世瑯邪祖之推。自高齊入周。徙居關中。萬年父思魯。以學藝稱。武德初。爲秦府記室參軍。師古少傳家學。博覽羣書。尤精訓詁。善屬文。薛道衡佳其才。每作文。令指摘疵短。仁壽中。李綱薦授安養尉。以幹治聞。罷歸。教授義師。入關。謁見長春宮。授朝散大夫。燉煌公府文學。歷起居中書二舍人。自武德以來。典司機密。資性敏給。明練治體。方軍國多務。每有大政事。詔令一出。其手冊奏之。工當時早及貞觀初。拜中書侍郎。封

琅邪縣男帝嘗嘆五經去聖遠傳習漸訛詔於秘書省考定多所釐正既成悉詔諸儒議各執所習共非毀之師古輒引晉朱舊文隨方曉答援據該明出其悟表人人歎服尋加通直郎散騎常侍因頒所定書於天下學者賴之俄拜秘書少監專刊正古篇奇字世所惑者討析申熟必暢本源然多引後生貴勢至富室子咸竄選中父初與母不相宜師古苦諫不聽情有所隔由是素譏薄之斥爲柳州刺史未行帝惜其才讓曰卿之學信有可稱而事親居官無間念卿曩經任使朕不忍棄後宜自戒師古謝罪復爲故官既負其才早見舉策意望甚高居常簡峭視行輩傲然罕所推接及是罔然喪沮乃闔門謝客巾褐褻帔放情蕭散爲林壑之適多藏古圖書器物書帖俄又奉詔撰定五禮及成進爵爲子又爲太子承乾注西漢書賜物二百段良

馬一後與急就章咸大顯于時帝將有事太山撰定儀注詔諸儒叅詳適中以付有司事未及行遷秘書監弘文館學士以從征遼道病卒年六十五諡曰戴有集六十卷永徽三年子揚廷爲符璽郎表上所撰匡謬正悞八卷詔留秘閣酬以帛從父游秦武德初累遷康州刺史封臨沂縣男值劉黑闥初平人多疆暴比至撫恤境內禮讓大行邑里歌之璽書獎勞終鄆州刺史撰漢書決疑師古多資取其義弟相時字膚亦以學聞爲天策府參軍貞觀中累遷諫議大夫有諍臣風轉禮部侍郎性友愛羸瘠多病兄死不勝哀而卒

薛收字伯褒蒲州汾陰人本隋內史侍郎道衡子出繼從父孺年十二能屬文痛父非命潔身不仕遁于首陽山與從兄德音從子元敬齊名時稱河東三鳳收爲長雅德音爲鸞德元敬年

最小爲觴。雖聞義師興。將舉族應之。爲蒲守堯君素所覺。留其母王氏不得赴。已而君素降王世充。收挺身歸國。房玄齡薦於秦王。卽日召見。問以方略。所對合旨。授王府主簿。俄判陝東大行臺遷金部郎中。從討世充。軍中書檄露布多出於收。該敏贖速有如宿構。馬上口占。曾無點竄。尤長計策。遇建德來援。諸將爭欲斂軍以觀形勢。收獨建議曰。世充據東都。府庫盈衍。所苦乏食。其兵皆江淮選卒。方爲我持求戰。不得。今建德總衆而來。必飛輟轉糧。更相資哺。兩賊連結。勝負未可以歲月定也。不若嚴示諸將。堅壁峻壘。戒毋出兵。大王親督精銳。邀建德於路。彼以道遠力疲。當吾堂堂之鋒。一戰必舉。不旬日二賊可縛致麾下矣。王善其謀。果獲大功。入東都。觀隋宮室。上書深用。爲鑒悅之王。開天策府。拜上將。命爲讓表。卽授天策府記室參軍。王因

侍高祖遊後園獲白魚命爲獻表援筆立就不復停思時甚推
二表人所難及從平劉黑闥封汾陰縣男武德六年兼文學館
學士時蒙殊禮受心腹之寄又上書諫止畋獵王手答比其言
如明珠兼乘賜以黃金四十鎰以酬雅意七年寢疾卒年三十
三王哭之慟親自臨窆憫其子元超幼賜物三百段贈定州
刺史永徽中加贈太常卿陪葬昭陵有文集十卷 元敬隋選
部郎邁之子武德中亦任秘書郎天策府參軍兼直記室並爲
文學館學士收卒王思之不已與書道其款曲及圖學士等形
像恨不早及復與浩嘆元敬性謹畏收與房杜更相結附元敬
獨未嘗申款二人每嘆以爲不可得而親不可得而疏及王爲
皇太子除舍人專掌文翰一不及政務號爲稱職卒于官 從
子稷字嗣通擢進士累遷禮部郎中中書舍人與從兄曜同在

兩省皆以辭學知名。任正諫大夫。景龍末。授爲諫議大夫。時稱二諫。俄兼昭文館學士。好古博雅。尤工隸書。得外祖魏徵家所藏虞褚書法。銳精臨倣。結體遒麗。遂以書名天下。又善畫。深探古跡。號爲絕品。睿宗在藩。留意于學。特見招引。俄令其子伯陽尚仙源公主。及踐祚。遷太常少卿。與蘇頲對掌制誥。嘗諷鍾紹京辭中書令。因言於帝曰。紹京本胥吏。素無才望。今特以勳進。師長百僚。恐非朝廷具瞻之美。帝然之。改紹京戶部尚書。翌日遷稷黃門侍郎。參知機務。與崔日用數爭事。帝前罷爲左散騎常侍。歷太子少保。禮部尚書。以翊贊功。封晉國公。實封三百戶。帝每名入宮。叅決庶政。恩絕羣臣。莫與爲比。久之。坐預知寶懷貞謀。不以聞。賜死。萬年。獄年六十五。伯陽拜右千牛衛將軍。駙馬都尉。亦以功封安邑郡公。食實封四百戶。貶晉州別駕。

道流嶺表自殺子談尚玄宗恆山公主至光祿卿

令狐德棻宜州華源人其先乃燉煌右族父熙隋鴻臚卿德棻博貫文史早知名隋末爲藥城長避亂不就屬義旗建淮安王神通據太平宮立總管府署爲記室俄引直大丞相府武德初轉起居舍人遷秘書丞受詔集藝文類聚時大亂後經籍亡散秘書湮缺請帝重購求天下遺書置吏補錄不數年圖典略備建言近代無正史梁陳齊文籍猶有可據至周隋事多脫漏前詔蕭瑀等整振論撰多不能就今耳目相近尚有可憑復更數年事皆汨沒無所振拾陛下受禪于隋又承周曆本朝列祖功業並在今不論次後無傳焉乃詔與岑文本崔仁師撰次周史仍總知類會梁陳齊隋諸史武德以來創修撰之源自德棻始也書成遷禮部侍郎尋彭城縣男又修新禮成進爵爲子氏族

志成皆有絹帛之賜。轉太子承乾右庶子。坐廢除名。會修晉書。房玄齡奏起之。預選十有八人。推爲先進。類列多所諮定。書成。除秘書少監。永徽初。又選定律令。復禮部侍郎弘文館學士。監修國史。及五代史志。遷太常卿。高宗嘗召坐中華殿。問何修而王若爲。而霸孰當。先後對曰。王任德。霸任刑。夏殷周純用德。而王。秦專刑而霸。至漢雜用之。魏晉以降。王霸兩失。又問。今茲何爲。而要對曰。古者爲政。清心簡事爲本。今天下無虞。年穀豐衍。惟薄賦斂。省征役。卽王道不遠矣。又問。禹湯桀紂所以興亡。對曰。傳稱禹湯罪已。其興也勃焉。桀紂罪人。其亡也忽焉。二主皆惑嬖于色。殺戮諫者。造炮烙之刑。此所以亡也。帝悅。厚賜之。然不能用。四年。遷國子祭酒。崇賢館學士。進爵爲公。以金紫光祿大夫致仕。卒。年八十四。諡曰憲。

王世隆相州人初爲王世充兄子太賓客與守河陽秦王攻洛陽逆書諭太世隆報書夸慢洛陽平亡命變姓名號隱玄先生棲白鹿山貞觀初召授國子主簿與慕容善行劉劼庾安禮俱爲修史學士內負宿罪居嘗無聊太宗遣房玄齡諭以向爲人作書各忠其主我爲天子尚追責匹夫之過慎勿有疑改著作佐郎歷衛尉丞採隋舊事爲東都記三十卷終著作佐郎顧胤吳人隋秘書學士覽子永徽中累遷起居郎修太宗實錄勞加朝散大夫弘文館學士論次武德貞觀兩朝國史加朝請大夫封餘杭縣男終司文郎中子琮武后時至天官侍郎同鳳閣鸞臺平章事

李延壽本隴西著姓徙居相州貞觀中累補太子膳丞崇賢館學士以修五代史晉書勞轉御史臺主簿兼修國史父太師多

載前世舊事。常以宋齊梁陳齊周隋天下參隔。南方謂北爲索。鹵北方指南爲島夷。其史於本國詳。他國略。往往訾美失傳。思所以改正。擬春秋編年。刊究南北事。未成而歿。延壽乃追終先志。本魏登國元年。盡隋義寧二年。作本紀十二。列傳八十八名。爲北史。又本宋永初元年。盡陳貞明三年。作本紀十。列傳七十一名。爲南史。合二書。凡八代百八十篇。上之。其書頗有條理。剛落醜辭。過本。書遠甚。遷符璽郎。兼修國史。卒。嘗撰太宗正典三十卷。調露中。高宗觀之。咨美。直筆賜其家帛五十段。又有李仁實。魏州頓丘人。官至左史。著格論三卷。通曆八卷。并戎州記等書。行于世。

敬播。蒲州河東人。貞觀初擢第。授太子校書。參纂隋書。遷著作佐郎。兼修國史。上高祖太宗實錄四十卷。賜物五百段。太宗代。

高麗凡歷六山輒名駐蹕。播曰鑾輿不復東矣。山所以名蓋天意也。果然。又與令狐德棻等撰晉書。播創凡例。房玄齡以爲有良史材。比之陳壽。顏師古注漢書。文繁令覈。其要爲四十卷。又預議大逆。連坐兄弟。律文播以爲今之世俗生多異室。死或別宗。且朝廷高官重祿。封蔭父子。而不及昆季。安得榮隔其蔭。而罪聯其罰哉。詔從之。遷太子司議郎。時方初置職。尤清近人。以爲榮永徵。後歷諫議大夫。轉給事中。俄坐事出。爲越州長史。徙安州卒。

劉伯莊。彭城人。爲弘文館學士。歷國子助教。博士。預修文惠博要及文館詞林終崇賢館學士。時大興史記。漢書。撰音義地名各二十卷。子之宏。世其學。武后時以著作郎兼修國史。終相王府司馬。睿宗立。贈秘書監。

秦景通晉陵人仕至太子洗馬兼崇賢館學士弟暉復踐其官兄弟皆精漢書有名號大秦君小秦君當時治漢書非其授者以爲無法劉訥言乾封中歷都水監簿以漢書授沛王王爲太子權洗馬兼侍讀太子廢除名

崔信明青州益都人後魏尚書光伯曾孫祖紹北海郡守信明以端午日正中生有異雀數頭身形甚小五色畢備集于庭樹鼓翼齊鳴紹占之曰異日必文藻煥爛聲名播天下然祿位殆不高及長博聞強記下筆成章大業中爲堯城令寶建德僧號欲引用之遁隱於太行山貞觀六年應詔舉授典世丞遷秦川令卒子冬日則天時爲黃門侍郎被酷吏所殺

張蘊古相州洹水人自幼性聰敏能背碑覆局及長博涉書傳善綴文尤曉時務與謝偃齊名爲州閭所稱署幽州總管府記

室遷直中書省太宗初卽位上大寶箴以諷詞載舊史始嘉納之賜以束帛除大理丞忌其言直心有所恨因勒河內人李孝德獄言其癡病法不應坐爲御史權萬紀所劾太宗驟怒斬之尋帝亦悔因下制凡決死者命所司五覆奏自蘊古始天下病偃從諫蘊古切直卒以是禍極爲寃之 偃衛縣人本姓直勒氏祖孝政北齊散騎常侍改姓謝偃善作賦仕隋爲散從員外貞觀初及第歷高陵縣簿十一年駕幸東都穀洛泛溢上封極言得失太宗稱善引爲弘文館直學士拜魏王府功曹嘗爲塵影二賦甚工太宗召見令述區宇又安功德茂盛自爲序但令作賦偃奉詔撰成名曰述聖賦賜綵數十匹又獻惟皇誠德賦大略以理忘亂安忘危夫此四者人君莫不皆然冀巾諷諭詞載舊史與李百藥齊名時稱李詩謝賦府廢出爲湘鄉令卒有

文集十卷

張昌齡冀州南宮人弱冠與兄昌宗皆以文詞知名舉進士及王公治皆爲考功王師旦所黜太宗問之答曰其文浮靡華而少實取之恐後生勸慕亂陛下風雅帝然之會翠微宮成詣闕獻頌得召見試草息兵詔俄頃而就稱爲禍衡潘岳之儔甚悅勅於通事舍人裏供奉賀蘭敏之奏諫北門修撰尋爲崑山道行軍記室破盧明月平龜茲軍書露布皆其所作再轉長安尉出爲襄州司戶卒有文集二十卷 昌宗官至太子舍人修文館學士撰古文紀年新傳三十卷

崔行功恆州井陘人北齊鉅鹿太守伯讓曾孫博陵徙家自少好學唐儉愛其才以女妻之命爲前後征討文表高宗時轉吏部郎中善於敷奏嘗兼通事舍人內供奉坐事貶尋徵爲司文

郎中朝廷大手筆多行功及李懷儼之詞二人相次充蘭臺侍郎委以校理四部羣書仍專知御集預撰晉書及文思博要等咸亨中官名復舊改秘書少監卒于官有集六寸卷 同時孟利貞華陰人父神慶高宗初爲沁州刺史以清介著名利貞初爲太子司議郎預修瑤山玉彩高宗稱善加給賜物累轉著作郎加弘文館學士撰續文選十三卷兄允忠垂拱中爲天官侍郎董思恭吳人所著篇詠甚多爲時人所重初爲右史知考功舉坐預泄問目流死 元思敬總章中爲協律郎預修芳林要覽撰詩人秀句兩卷傳於世

問曰維聖允文滌盪蒼昊登瀛拔萃星輝日照副此五絕兼濟羣妙初唐之運一人大造

劉子玄本名知幾彭城人高祖禱之後魏臨淮鎮將從祖胤之

少有學業與孫萬壽李百藥爲忘年友武德中杜淹薦授信都令有惠政永徽初轉著作郎弘文館學士與令狐德棻楊仁卿等撰國史及實錄封陽城縣男終楚州刺史從父延祐舉進士補渭南尉吏能爲畿邑最歷右司郎中檢校司賓少卿封薛縣男命斷徐敬業獄赦其迫脅凡受五品僞職者流六品以下除名俄出爲箕州刺史轉安南都護被殺父藏器高宗時爲監察御史遷侍御史比部郎中代傳儒業以述作名家六子俱有文學登進士長知柔歷荆揚曹益宋海唐七州長史并刺史國子司業鴻臚卿尚書右丞戶部侍郎工部尚書東都留守卒贈太子少保諡曰文知幾初調獲嘉縣簿證聖初上表陳四事詞甚切直與徐堅元行沖吳兢等約爲海內知己時官爵僭濫法網嚴密士類兢進多陷刑戮乃著思慎賦以刺時且以見意蘇味

道李嶠歎美。以比陸機。累遷鳳閣舍人。太子率更令。秘書少監。皆領史事。與監修。蕭至忠。宗楚客等不合。奏記求去。言五不可。其一。古人爲史。皆出一家。未聞藉功干衆。唯漢東觀集。羣儒纂述。無主。條章不建。今時取士。滋多人。自爲荀袁。家自爲政。駿每記一事。載一言。問筆相視。含毫不斷。頭白可期。汗青無日。其二。漢郡國計書。先上太史。副上丞相。後漢公卿有所撰述。先集公府。乃上蘭臺。故史官載事爲廣。今時惟自詢采。二史不注起居。百家弗通行狀。其三。史局深藉禁門。以杜顏面。防請謁。今作者如林。儼示褒貶。曾未絕口。胡野咸知。取嫉權門。見讐貴族。各懷畏懼。其四。古來爲史。各有指歸。今各注記。類稟監修。或須直辭。或當隱惡。十羊九牧。其令難行。其五。朝廷厚用人才。而薄其權。至監者不肯指授。修者又不遵奉。務相推避。以延歲月。至忠得

書恨惜其才不許解任楚客等曰是子欲置吾何地怨之所著
史通內外四十卷譏評今古徐堅讀之語爲史者宜置座右
又自比楊雄慨雄好雕蟲小伎老而悔悟吾幼喜詩賦壯亦不
爲雄著書見尤於人作解嘲吾亦作釋蒙雄少爲范滂劉歆所
器至準易作經笑云必覆醬瓿吾始以文章得譽晚作史通俗
以爲愚所撰劉氏家史別著譜考推漢爲陸終苗裔非堯之後
彭城叢亭里諸劉出楚孝王賢曾孫居巢侯殷不承楚元王按
據明審正累代失誤議者許其博嘗期得封必以居巢紹司徒
舊邑後果以修武后實錄功封居巢縣子人推其鄉號高陽里
曰居巢玄宗爲太子遷左庶子兼崇文館學士以嫌名改子玄
會將釋奠國學有司議從臣著衣冠乘馬啓奏古大夫以上皆
乘車以馬爲駢服意者專車憑式可服朝衣單馬御鞍宜從褻

服矧今陵廟巡謁王公問命士庶親迎皆盛服冠履乘輅車他
事無車故貴賤通乘馬此法駕所幸侍臣皆馬上朝服非惟不
師於古亦自取驚流俗馬逸人顛受嗤行路太子從之著爲令
開元初遷左散騎常侍嘗議孝經非鄭康成注當以古文爲正
易無子夏傳老子書無河上公注請存王弼學宰相宋璟等奏
與諸儒質辨博士司馬貞等阿意請二家兼行惟罷子夏易傳
詔可俄以子貺爲太樂令抵罪請於執政上怒貶安州別駕卒
年六十一生平善持論辯探明銳視諸儒皆出其下朝有論著
輒豫領國史三十年不因官徒職掌故舊尚書鄭惟忠嘗問自
古文士多史才少何也對曰史有三長才學識世罕兼之故善
者少夫有學無才曾愚賈操金不能殖貨有才無學猶巧匠乏
根柢斧斤弗能成室惟有識者善惡必書使驕主賊臣知懼此

爲無可加者。時謂篤論。歿後帝詔河南就家寫史通讀之稱善。追贈工部尚書諡曰文六子皆有名。 貺字惠卿自幼好學多所通解代領史職授起居郎歷右拾遺內供奉嘗續說苑十篇以廣劉向所遺而刊落怪妄又著春秋外傳以竹書紀年序諸侯列會皆舉諡乃後人追修非當時正史如齊人穰子遂鄭棄其師皆孔子新意師春一篇錄卜筮事與左氏合知按春秋經傳而爲也子滋見宰輔 決亦有學居東都生子敦儒性至孝母病狂易喜咎掠人左右皆亡去惟日侍疾體常流血怡然不爲痛楚及喪毀瘠幾死時稱孝子韋夏卿旌表門閭元和中權德輿薦授左龍武兵曹參軍分司東都後爲起居郎達禮好古有祖之風 餗字鼎卿天寶初歷集賢院學士知史事終右補闕著史例頗有法 彙博涉經史大曆中爲左散騎常侍終荆

南節度使 廼以剛直稱第進士歷殿中侍御史佐江淮轉運使更安史亂餽運財賦頗力于職大曆初爲吉州刺史治行尤與至給事中 秩字祚卿開元末歷左監門衛錄事參軍遷憲

部員外郎上書楊國忠言哥舒翰兵天下成敗所繫不可忽房琯以比劉更生至德初遷給事中出爲閬州刺史貶撫州長史卒所著政典止戈記至德新議等凡數十卷 迅字捷卿歷京

兆功曹叅軍元魯山著三賢論其一迅也上元中避地安康卒

吳兢河南浚儀人少厲志勤學貫通經史方直寡諧與魏元忠

朱敬則游薦兢才堪論議詔直史館遷右拾遺內供奉神龍中

改右補闕時因節閔之難上書極論相王仁孝與陛下同氣托

爲命脈親莫加焉其言切至賴以無患轉起居郎俄遷水部郎

中皆兼史職玄宗初立收還權綱銳於決事羣臣畏伏兢慮帝

果而不及精乃上疏其略曰人將疾必先不甘魚稻之味國將亡必先不樂忠諫之說故漢高帝赦周昌桀紂之對晉武帝受劉毅桓靈之譏况陛下裕遠大度初卽位時猶有楮無量張廷珪韓思復辛替否柳澤袁楚客等數爭得失自頃上封往往得罪諫者頓少誠恐天下骨鯁士以讜言爲戒撓直就曲斲方爲神偷合苟容不復能盡節忘身納君於道隋煬帝叢柳禍根趙辛胤戮乃曰有諫我者當時不殺後必殺之本朝太宗密比好言搜爬理道嘗謂天下萬機一人聽斷雖甚憂勞不能盡善凡有上書益於政者皆黏寢殿之壁坐望臥觀雖狂瞽逆意終不以爲忤故外事必聞刑戮幾措禮義大行陛下何不遵此道與聖祖繼美乎尋以母喪去官服除自陳修史有緒家貧不能具紙筆願得少祿官具筆札以終餘功詔拜諫議大夫兼修國史

睿宗崩實錄留東都詔馳驛取進父喪服終爲太子左庶子帝
東封道中數馳射爲樂兢進諫帝矍然爲止明年六月大風兢
上疏臣聞百王之失皆由權移於下故天降災異欲人主感悟
臣願杜絕其萌斥屏羣小不爲慢游出不御之女斥不賓之臣
澄心慮攬乾綱存至公抑僥倖雖有風變不足累聖德矣始景
龍中諸武二張監領史職阿貴朋佞醜澤浮辭事多不實兢乃
私撰唐春秋未就詔就集賢院論次大臣奏係國史不容在外
復令赴館撰錄賜爵長垣縣男久之坐書事不當貶荊州司馬
以草稿自隨蕭嵩復領史奏遣使者就兢取書得六十餘卷遷
洪州刺史坐累下除舒州天寶初入爲恆王傅雖年老衰憊意
猶願還史職李林甫忌不用卒年八十生平敘事簡核號稱良
史晚節稍疎樸人病大簡獨於實錄中敘張昌宗誘張說誣證

魏元忠事言說已然可賴宋璟等激勵苦切故轉禍爲忠不然皇嗣且殆其言一不減後說爲相讀之知兢所爲心甚不善乃謬謂劉生背魏齊公事不少假借奈何兢曰子立已亡不可受誣地下就實書之其草故在聞者歎謬復屢以情祈改辭曰徇公之情何名實錄卒不從世謂今之董狐

韋述曾祖弘機父景駿述自幼篤意文學姑子元行冲爲世儒宗儲書甚富述入觀之不知寢食記誦略徧行冲異之試與議論熟復詳諦前代事一如指掌使屬文受紙輒就嘆曰外家寶也少舉進士儀質陋悅考功宋之問曰童子何業答曰性嗜書所撰唐春秋三十卷恨未畢他惟命之問曰本求茂才乃得選固擢上第開元初爲櫟陽尉馬懷素奏與諸儒卽秘書續七志五年而成素好譜學私寫柳冲姓族系錄歸而締玩故於百氏

源派爲詳更撰開元譜二十卷累除右補闕張說薦爲集賢院直學士遷起居舍人兼知史事轉屯田員外職方吏部二郎中從封太山奏東封記有詔褒美徐堅先奉詔修六典構意歲餘未有所適蕭嵩引建撰定纂周六官各領其屬事歸於職規制遂立又令續纂令狐德棻吳兢等武德以來闕述不能成者參以後事分紀傳一百一十卷并使例一卷建成文約事詳蕭穎士深服以爲譙周陳壽不能過俄改國子司業充集賢學士累遷工部侍郎封方城縣侯典掌圖書餘四十年任史官二十年潛於榮利性復純厚長者接士無貴賤與均禮有所著書二百卷當世宗之蓄書二萬卷皆手校黃墨精謹中秘不逮兼富古草隸帖秘書古器圖譜遭亂剽失皆盡獨抱國史藏南山坐陷賊汚僞官流渝州爲刺史薛舒所困不食而死廣德初甥蕭直

任光弼判官詣闕奏事因理述倉卒辭過能存國史見送史官于休烈以功補過宜蒙恩宥得贈右散騎常侍自唐以來韋氏最稱顯盛孝友詞學則承慶嗣立憲音樂有萬石達禮儀則叔夏史才博識有述與弟迥迥迥巡學業相亞咸舉辭科迥嘗對爲學士迥並爲禮官與趙冬曦兄弟六人名爵相埒張說稱曰韋趙兄弟人之杞梓云

徐堅字子固湖州長城人徙居馮翊高祖整梁慈源侯祖孝德果州刺史二女皆后妃父齊聘八歲能文太宗召試賜所佩金削刀充弘文生調曹王府叅軍高宗愛其才令侍周王等屬文并皇太子講修書芳林門嫌以恩進求出爲姚林令累遷西臺舍人善於文誥爲當時所稱高宗許突厥酋長子弟得事東宮上書切諫以爲詭誕還裔解髮削衽使在左右非所謂敬慎威

俄以近有德帝不能用太子及敗又諫齊獻公陛下外祖今子無忌以讒死信爲有罪不宜毀及先廟反崇飾周忠孝公廟恐非所以示海內帝寤詔復獻公官以無忌孫延主其祀俄坐漏禁中事貶蘄州司馬流欽州卒年四十四睿宗贈禮部尚書堅幼孤有敏性沛王聞其名召令作賦異之及壯寬厚長者舉秀才爲汾州參軍遷萬年簿楊再思王方慶共引爲留守判官方慶善禮學嘗就質疑堅爲申釋得所未聞復以文詞典雅稱爲鳳閣舍人樣預修三教珠英總裁張昌宗李嶠不能下筆堅與張說構意以文思博要爲主更加姓氏親族二部漸有條彙諸人依其規制書乃得成遷給事中封慈源縣子上言書有五聽介有三覆重下情也朱夏在辰卽戒刑戮順天道也比見言事入羣月將陛下卽令殺之竊以人命至重矧當盛夏天道生長

致傷和氣。伏望詳依國典。俯賜哀矜。中宗納之。令杖決配流嶺表。又奏古者罰不逮嗣。故詔書與逆同堂。親不任京畿。總麻親不得侍衛。今選部廣責逆人。輒至無服親屬。請如詔書外一切不禁。以申曠蕩。俄拜禮部侍郎。修文館學士。睿宗卽位。授左庶子。兼崇文館學士。俄轉黃門侍郎。知政事。時御史李知古擊降姚州。洱河蠻請築城輸賦。堅譏蠻域羈縻。不宜與中華同法。恐勞師遠役。益不償損。不聽。蠻果懼殺知古。相率復叛。俄以妻兄岑義附太平公主。恐及禍。固辭機密。轉太子詹事。義誅外。徙爲絳州刺史。久乃遷秘書監。左散騎常侍。玄宗初建集賢院。以學士從封泰山。參定禮儀。加光祿大夫。進東海郡公。卒年七十餘。帝悼惜。遣使就弔。贈太子少保。諡曰文生。平熟於典故。凡七當擢。次高選。時論推之。子嶠。字巨山。開元中爲駕部員外郎。集

賢院直學士遷中書舍人內供奉河南尹封慈源縣公父子祖孫三世皆爲學士舍人人以是稱

冊曰劉氏三長人所最難一願逢時二願有官逢時孟浪有官素餐嗟我何人獨抱歲寒剛千萬冗洗百億癯五史彙成足稱大觀子子孫孫莫漫封刊